

09/05/2002

Telekom minta tempoh kaji turun tarif panggilan

KUALA LUMPUR, Rabu - Telekom Malaysia Berhad diarah mengkaji kadar tarif panggilannya supaya lebih ramai rakyat boleh menggunakan kemudahan telekomunikasi, termasuk perkhidmatan Internet.

Arahan itu dibuat Menteri Tenaga, Komunikasi dan Multimedia, Datuk Amar Leo Moggie, menyusul gesaan Perdana Menteri, Datuk Seri Dr Mahathir Mohamad, baru-baru ini supaya tarif itu diturunkan.

Timbalan Menteri Tenaga, Komunikasi dan Multimedia, Datuk Tan Chai Ho berkata Telekom sedang melakukan kajian berhubung perkara itu.

"Memang saya terima aduan mengenai Internet dan kadar panggilan mahal, tapi kita baru saja melaksanakan kadar tarif baru Mac lalu.

"Jadi bagilah masa untuk Telekom menjalankan kajian. Kita kena tunggu pada Jun atau Julai kerana kalau sekarang terlalu awal untuk kita membuat perbandingan.

"Sekarang baru Mei, dua bulan selepas kadar baru tarif diperkenalkan. Kita hanya baru terima dua bil dan kita tidak dapat melakukan analisis mengenai kadar tarif baru itu lagi.

"Kita kena tunggu beberapa bil dan jika dapat buat perbandingan kita akan umumkan," katanya selepas majlis pelancaran laman web www.labelsz.com di sini, hari ini.

Jumaat lalu, Perdana Menteri menggesa Telekom menurunkan kadar panggilannya supaya lebih ramai rakyat boleh menggunakan kemudahan telekomunikasi.

Sebelum ini, Telekom Malaysia membuat semakan kadar tarif panggilan telefon berkuat kuasa 1 Mac lalu.

Mengikut kadar tarif baru itu, semua panggilan tempatan disemak kepada lapan sen bagi dua minit pertama dan empat sen bagi setiap minit berikutnya berbanding bayaran sebelum ini iaitu sembilan sen bagi dua minit pertama dan tiga sen bagi setiap minit berikutnya.

Kadar jarak jauh domestik dikurangkan di antara 23 peratus dan 54 peratus dan tarif bagi Dail Terus Antarabangsa (IDD) dikurangkan di antara tujuh peratus dan 67 peratus.

Sementara itu, Tan berkata sehingga tahun lalu dua juta penduduk di negara ini mendaftar bagi perkhidmatan Internet.

(END)